

РОЖДЕСТВО ЧЕСТНАГО СЛАВНАГО ПРОРОКА, ПРЕДТЕЧИ И КРЕСТИТЕЛЯ ИОАННА

НА МАЛОЙ ВЕЧЕРНИ

На Господи, воззвах: стихиры на 4, глас 4.

Подобен: Званный свыше:

Из неплодныя родился еси утробы, / разрешивый неплодие сердец наших / и благочадие в вере же и истине, / душам неплодным слово даруя, / славный Предтече пришествия Христова. / Глас Слова благознаменитый, / покаяния прознаменатель велегласный, / ветхаго же и новаго Божественный ходатай, / яве познаваемъ, / егже рождество любовью празднуем, веселящися.

Упитанный ныне воздержания телец / от неплодныя родися, / показуя нам от Девы Отроковицы Агнца рождена / и мира вземлющаго согрешения. / Горлица пустынелюбная яве возсия, / Божественную весну возвещающая, / имже преста безбожия зима лютая / и Жениха друг искренний / светло прииде Иоанн, / моля спастися душам нашим.

Иже по Божественному рождся обетованию, / егда пречудный и великий Архангел / в церкви родителю твоему молящуся / благовествова твоё рождение, / тогда не верующу и прекословящу священнику, / якоже пишет, / безгласие Гавриил наведе и оглохновение, даже до рождества. / Ты же, Предтече, от отца рождся, / союз языка свободил еси, блаженне, / и молишися о всех нас.

Слава, глас 8. Самогласен:

Подобает Иоанну благовоение, / подобает Крестителю песней красота, / сей бо проповеда начаток нашего спасения, / разыгравыйся во чреве / и вопия в пустыни: покайтесь, / Царев воин, Предтеча благодати, / Агнца провозвещаая и Спаса моля о душах наших.

И ныне, Богородичен: Владычице, прими:

На стиховне стихиры, глас 2.

Подобен: Доме Евфрафов:

Уясни твой язык / светло, Захарие, / пророк отроча Божий будет, возопив, / и Слова Божественнаго / Предтеча.

Стих: Благословен Господь, Бог Израилев, / яко посетити и сотворит избавление людем Своим.

Явился еси / от матерних ложещ, Иоанне, / Богу освящен: / не воста бо болии в человецех, / никтоже паче тебе нигдеже.

Стих: И ты, отроча, / пророк Вышняго наречешися.

Разрешил еси отчее, / преблаженне, безгласие: / якоже безчадства ключи / разрешил еси рождшия, / родився от Божественныя благодати.

Слава, и ныне, глас 8:

Виждь Елисаветь, к Деве Марии глаголющу: / что пришла еси ко мне, Мати Господа моего? / Ты Царя носиши, и аз воина. / Ты Законодавца, и аз законоположителя. / Ты Слова, и аз глас, проповедающ Царство Небесное.

Тропарь зри на велицей вечерни.

Слава, и ныне, Богородичен: Ёже от века утаёное:

НА ВЕЛИЦЕЙ ВЕЧЕРНИ

По обычном псалме поем: Блажен муж: 1-й антифон.

На Господи, возвах: стихиры на 8. Глас 4.

Самогласны. Иоанна монаха:

Разрешает Захариино молчание рождейся Иоанн, / ибо не подобаше отцу молчати, пришедшу гласу, / но, якоже не веровавшу первее / язык связа, / сиче явльшуся дати отцу свобождение. / Емуже и благовестися, / и родися глас Слова / и Света Предтеча, моля о душах наших.

Днесь глас Слова, / глас, за неверие держимый, разрешает отец / и Церкви являет благочадие, / союзы неплодствия разрешая матери. / Светильник Света предгрядет, / заря Солнца правды возвещает пришествие / в создание всех и спасение душ наших.

Анатолия: Божию Словоу хотящу от Девы родитися, / Ангел от старческих чресл происходит, / великий в рожденных женами / и пророков превышший: / подобаше бо Божественных вещей преславным быти началом, / кроме возраста исчадие / и без семени зачатие. / Твориай чудеса во спасение наше, / слава Тебе.

Андрея Критскаго: Явися днесь великий Предтеча, / от неплодных ложесн Елисавети произшед, / болий всех пророков пророк, / и ин несть, ниже воста: / яко Предтечи, светильнику, Свет последова пресветлый, / и гласу – Слово, / и невестоводцу – Жених, / готовящему Господеву люди изрядныя / и предочищающу при Дусе водою, / Захариино прозябение / и пустыни доброе воспитание, / покаяния проповедник, / очищение согрешений, / сущим во аде благовествуяй из мертвых востание / и моля о душах наших.

Пророк и Предтеча из утробы явился еси, / Христов Крестителю Иоанне, / играя и радуясь во чреве матери, / зря Царицу, пришедшу к рабе, / носящую Безлетнаго, от Отца без матери, / к тебе, от неплодных и старца по обетованию возсиявшему. / Того моли помилovati души наша.

О, преславнаго чудесе! / Иже слову Ангела не веровавый, глаголющу, / яко зачнет Елисаветь и родит сына, глаголя: / како тая родит, / зане аз заматерех / и оная удеса умертвися? / Осудивыйся молчати за неверие / днесь зрит раждаемо обещанное / и, молчания разрешься, / в веселие входит, /

благословѣн, – вопія, – Господь, Бог Израилев, / яко посетити и сотвори избавление людем Своим, / подай миру велию милость.

Иоанне прехвальне, / и вселенский апостоле, / Гавриилово благовествование, / и неплодныя прозябение, / и пустыни доброе воспитание, / и искренний друже Жениха Христа, / Того моли помилватися душам нашим.

Слава, глас 6. Византиево:

Днесь Света свѣтильник / предпутіе творит пришествию Божия Слова, / яко звезда свѣтлая, / днесь Захаріин язык уяснися, / молчание держав, Ангелу повелѣвшу, / подобаше бо сице отцу / глас немолчанием хранити, произшедш из утробы неплодныя / и всего мира избавление благовествующ / со дерзновением многим.

И ныне, глас тойже:

Елисаветъ зачат Предтечу благодати, / Дева же Господа славы, / целовастесь обе матери, / и младенец възгрся, / внутрь бо раб хваляше Владыку. / Удивившись же, матери Предтечева начат вопити: / откуда мне се, да Мати Господа моего прииде ко мне? / Да спасет люди отчаянныя / Имѣяй велию милость.

Вход. Прокимен дне.

Бытія чтѣние (главы 17, 18, 21):

Рече Бог Аврааму: Сара, жена твоя, не наречется имя ей Сара, но Сарра будет имя ей. Благословлю же ю, и дам тебе от нея чадо, и благословлю е, и будет во языки, и царие язык от него изыдут. И падѣ Авраам на лице своем, и рече в мысли своей: аще столѣтну родится сын? И Сарра, девяност лет сущи, родит? Рече же Бог Аврааму: ей, се Сарра, жена твоя, родит тебе сына, и наречеши имя ему Исаак. И положу завет Мой к нему в завет вечен. Авраам же и Сарра престарѣвшая во днѣх. Возсмея же ся Сарра в себе, глаголющи: не у ми бысть даже до ныне, господин же мой стар. И рече Господь Бог Аврааму: что яко возсмеяся Сарра в себе, глаголющи: убо воистинну ли рожду? Аз же состарѣхся. Еда не возможет от Бога всяк глагол? И Господь Бог посетит Сарру, якоже глагола. И, зачѣнши, родит Аврааму сына в старости, якоже глагола ему Господь Бог. Обрѣза же его в день осмый, якоже заповѣда ему Господь Бог. И Авраам бѣше лет ста, егда бысть ему Исаак, сын его. Рече же Сарра: смех ми сотвори Господь Бог. Иже бо аще услышит, срадуется мне. И рече: кто возвестит Аврааму, яко сосцами питает отроча Сарра, яко родих отроча в старости моей? И возрастѣ отроча, и престѣ сосцами питатися. И сотвори Авраам учреждѣние велие, вонже день отдоися Исаак, сын его.

Судей чтѣние (глава 13):

Во дни оны бысть муж от колѣна Данова, и имя ему Маное, и жена его неплоды, и не раждаше. И явися Ангел Господень к женѣ, и рече к ней: се ты неплоды, и во чреве приимеши, и родиши сына. И ныне сохранися, не пей вина и сикѣра и не яждь всяко нечисто. Зане се ты во чреве приимеши и родиши сына, и желѣзо не взыдет на главу его, яко освященно Богу будет отроча из

чре́ва. И при́иде жена́, и рече́ му́жу своему́, глаго́лющи: я́ко челове́к Бо́жий при́иде ко мне, и видéние его́, я́ко видéние А́нгела Бо́жия свéтло зелó. И рече́: се во чре́ве при́ймеш и роди́ши сы́на; и ны́не не пий вина́ и сикéра и не яждь вся́ко нечýсто, я́ко освящéнно Бо́гу бýдет отрочá из чре́ва дáже до дне смéрти его́. И помоли́ся Манóе Бо́гу, и рече́: ко мне, Гóсподи, челове́к Бо́жий, его́же послáл еси́ к нам, да при́идет úбо и просвети́т нас, что сотвори́м отрочáти ражда́ющемуся? При́иде же А́нгел к Манóю и рече́: от всех, ихже рекóх женé твоéй, да сохрани́тся, ели́ка исхóдят от виногра́да, да не яст и вина́ и сикéра да не пиéт. И рече́ Манóе ко А́нгелу Госпóдню: что íмя твоé? Да егда́ при́идет глагол твой, прослáвим тя. И рече́ ему́ А́нгел Госпóдень: вскúю ты вопроша́еши íмене моего́? И то есть чýдно. И не приложи́ ктому́ А́нгел Госпóдень яв́итися к Манóю и женé его́.

**Прорóчества Исáиина чтéние
(главы 40, 41, 45, 48 и 54):**

Та́ко глаго́лет Госпóдь: утешáйте, утешáйте лю́ди Моя́, глаго́лет Бог. Свящéнницы, глаго́лите в сéрдцы Иерусали́му, умоли́те его́, я́ко умно́жися смире́ние его́, разреши́ся бо грех его́, я́ко при́ят из руки́ Госпóдни сугúба согрешéния своя́. Глас вопи́ющаго в пусты́ни: уготóвьте путь Госпóдень, пра́вы твори́те стези́ Бо́гу нáшему. На гóру вы́соку взы́ди, благовествúй Сиóну, возвыша́й крéпостию глас твой, благовествúй Иерусали́му, вознеси́те, не бо́йтеся. Аз Госпóдь Бог, Аз услы́шу убóгих, Изра́илев, и не оста́влю тех. Но отвéрзу от гор ре́ки и посреде́ по́ля исто́чники, сотвори́ю пусты́ню в луг и жа́ждущую зéмлю во исто́чники водны́я. Да возвесели́тся нéбо свýше, и о́блацы да кропят пра́вду, да возсия́ет зéмля, и да прозя́бнет мýлость, и пра́вда да возсия́ет вкúпе. Глас весéлия возвести́те, и услы́шано да бýдет, возвести́те дáже до конéц зéмли. Глаго́лите, я́ко избáви Госпóдь раба́ Своего́ Иáкова, и áще вжа́ждут в пусты́ни, источи́т им во́ду из ка́мене. Возвесели́ся, непло́ды неражда́ющая, растóргни и возопи́й, неболе́вшая, я́ко мно́га ча́да пусты́я па́че, нéжели имúщия му́жа.

На литии стихиры самогласны, глас 1:

Иска́пайте, гóры, сла́дость, / и хóлми, я́ко áгнцы, взыгра́йте, / я́ко роди́ся от Елисавети́ / хотя́й с нáми водвори́тися Госпóдень Предте́ча, / разреши́вый в рождестве́ óтчее безгласие. / Тем и мы вопи́ем ему́: / Крестите́лю Христóв, моли́ спаст́ися душáм нáшим.

Богознамени́тый глас, Свéта свети́льник, / Госпóдень Предте́ча, / Христóм свидéтельствoванный, / пéрвый во прорóцех, о ми́ре моли́тву твори́й, / изря́дно ста́до твоé помина́й, спаст́и невредíмо.

Проповéдник был еси́ А́гнца Бо́жия и Сло́ва, / Иоáнне прорóче и Предте́че, / прорица́еши б́дущая и предглаго́леш конце́м: / се А́гнец Бо́жий, взéмляй ми́ра грехи́ / и пода́й всем ве́лию мýлость.

Слава, глас 5. Андрея Критскаго:

Пророков предел и начало апостолов, / земнаго Ангела и Небеснаго человека, / глас Слова, воина и Предтечу Христова, / от обещания предвзыгравшая / и проповедавшая прежде рождества Солнца правды, / днесь Елисавет раждает, и радуется, / и чудится Захария в старости, / молчание, аки узу обложенну, отложив, / и яко родитель гласа пророчествует явленнейше: / ты бо, отроча, пророк Вышняго наречешися / и предидеши пути готовити Ему. / Темже, Ангеле, пророче, апостоле, / воине, Предтече, / Крестителю, и проповедниче покаяния, и наставниче, / яко глас света, Слова, / непрестанно молися о нас, / верою творящих твою память.

И ныне, глас тойже: Храм и дверь еси:

На стиховне стихиры самогласны, глас 2:

Иже от пророка пророка / и неплодныя прозябение, / в рожденных женами превышша всех, / пустынного гражданина, Иоанна славнаго / псалмы и пеньми и песньми духовными восхвалим, / вопиюще к нему: / Крестителю Спасов и Предтече, / яко имея дерзновение, / в честном твоём рождестве / умоли Христа даровати мир миру / и душам нашим велию милость.

Стих: Благословен Господь, Бог Израилев, / яко посети и сотвори избавление людем Своим.

Прииде глас благодати Слова, / Солнца проповедник, / родивыйся днесь от неплодове безчадныя, / от обетования Иоанн Предтеча. / Людие, радуйтеся: / прииде уготовати путь нам спасения, / Емуже и, выграв, поклонися, / во чреве сущу Матерни, / Агнцу, вземлющему грехи мира / и подающему нам велию милость.

Стих: И ты, отроча, / пророк Вышняго наречешися.

Иже из чрева материя освящая / и пророчества прием исполнение, / днесь от неплодныя раждается, / Господне пришествие проповедавая ясно: / покайтесь, приближися бо Царство Небесное.

Слава, глас 8. Кассии монахини:

Исаии ныне пророка глас / днесь в большего от пророк рождении Иоанна исполнися: / се бо, – рече, – послю Ангела Моего пред лицом Твоим, / иже уготовит путь Твой пред Тобою. / Сей убо, Небеснаго Царя воин, предтек, / яко воистинну правы творяше стези Богу нашему, / человек убо естеством, Ангел же житием сый, / чистоту бо конечно и целомудрие целовав, / имяше убо по естеству, / бежа же яже чрез естество, / паче естества подвизався. / Тому, вси вернии, добродетельми подобящися, / молити о нас молимся, / во еже спасти души наша.

И ныне, глас тойже:

Видь Елисавет к Деве Марии глаголющу: / что пришла еси ко мне, Мати Господа моего? / Ты Царя носиши, и аз воина. / Ты Законодавца, и аз законоположителя. / Ты Слова, и аз глас, / проповедающ Царство Небесное.

На благословении хлебов тропарь, глас 4, дважды, и Богородице Дёво: единожды.

Тропарь, глас 4:

Пророче и Предтече пришествия Христова, / достойно восхвалити тя недоумеем мы, любовью чтущии тя: / неплодство бо рождшия и отчее безгласие разрешися / славным и честным твоим рождеством, / и воплощение Сына Божия миру проповедуется.

НА УТРЕНИ

На Бог Господь: тропарь Предтечи, дважды. Слава, и ныне: Еже от века утаёное:

По 1-й кафизме седален, глас 4.

Подобен: Удивися Иосиф:

Ныне прозябё нам Захариин плод и веселит разумно мысли верных, / пустынное украшение и пророков степень, / темже Христов явися Предтеча и свидетель неложен пришествия Его. / Духовными убо песнями согласно Крестителю возопием: / пророче и проповедниче истины, моли спастися нам.

Слава, и ныне, Богородичен:

Удивися Иосиф, еже паче естества зря и внимаше мыслию, / иже на рунó дождь, в безсеменном зачатии Твоём, Богородице, / купинú, огнём неопалимую, жезл Ааронов прозябший, / и, свидетельствуя, обручник Твой и хранитель священником зываше: / Дёва раждает и по Рождестве паки Дёвою пребывает.

По 2-й кафизме, седален, глас 8.

Подобен: Премудрости:

Христова пришествия начаток, преславно родился еси, / яко воистинну, Иоанне всехвальне, пророков главизна, / и, яко глас Слова сый, зывал еси: / покайтесь, приблизися Царство Небесное. / Темже, уготовавый путь Господень, благодати Предтеча явился еси концём. / Крестителю и апостоле, моли Христа Бога прегрешений оставление даровати / празднующим любовью святую память твою.

Слава, и ныне, Богородичен:

Пресвятая Дёво, Мати Христова, души моя страсти лютыя исцели, молюся, / и прощение даруй моим прегрешениям, ихже безумне содеях, / душу и тело осквернив, окаянный. / Уви мне, что сотворю в час он, / внегда Ангели душу мою разлучат от страстного моего телесе? / Тогда Помощница ми буди и Предстательница теплейшая, Ты бо имам надежду, раб Твой.

Величание:

Велича́ем тя, / Предте́че Спа́сов Иоа́нне, / и чтим е́же от непло́дове / пресла́вное рождество́ твоё.

Псалом избранный:

Благословён Господь, Бог Израилев, яко посетити и сотворити избавление людем Своим. / И воздвиге рог спасения нам в дому Давидове, отрока Своего. / Клятсся Господь Давиду истиною и не отвержется её. / Тамо возвращу рог Давиду, уготовах светильник помазанному Моему. / Сильно на земли будет семя Его. / Род правых благословится. / Служити Ему в преподобии и правде пред Ним вся дни живота нашего. / И ты, отроча, пророк Вышняго наречешися. / Предыдеши бо пред лицом Господним уготовати пути Его, / дати разум спасения людем Его / во оставление грехов их милосердия ради милости Бога нашего, / направити ноги наша на путь мира.

Слава, и ныне: Аллилуиа: **Трижды.**

По полиелеи седален, глас 8.

Подобен: Повеленное:

Да радуется отец, матери, возвеселися, / яко пророка на земли родила еси днесь, Богозванного Предтечу от обещания. / Неплоды младенца питает Крестителя, и радуется Захария, рожденному глаголя: / разрешися язык мой твоим пришествием на землю, светильниче великаго Света. / Воистинну чудо преславно!

Слава, и ныне, Богородичен:

Благодарим Тя присно, Богородице, и величаем, Чистая, и поклоняемся, / воспевающе Рождество Твое, Благодатная, вопиюще непрестанно: / спаси нас, Дево Всемилостивая, яко Благая, / и демонов исхити словоположения страшнаго в час испытания, / да не посрамимся, раби Твои.

Таже степенна, 1-й антифон, 4-го гласа. Прокимен, глас 4: И ты, отроча, / пророк Вышняго наречешися. **Стих:** Благословён Господь Бог Израилев, яко посетити и сотворити избавление людем Своим. Всякое дыхание:

Евангелие от Луки, зачало 3:

Во днех оных зачат Елисавет, жена Захариина, и таяшеся месяц пять, глаголющи: яко тако мне сотворит Господь во дни, в няже призре отъяти поношение мое в человецех. Елисавети же исполнися время родити ей, и роди сына. И слышаша окрест живущии и ужики её, яко возвеличил есть Господь милость свою с нею: и радовахуся с нею. И бысть во осмый день, приидоша обрзати отроча, и нарицаху е именем отца его, Захарию. И отвещавши матери его, рече: ни, но да наречется Иоанн. И реща к ней: яко никтоже есть в родстве твоём, иже нарицается именем тем. И помахашу отцу его, еже како бы хотел нареши е. И испрошь дщицу, написа, глаголя: Иоанн будет имя ему. И чудяхуся вси. Отверзошася же уста его абие и язык его, и глаголаше благословя Бога. И бысть на всех страх живущих окрест их, и во всей стране иудейстей повёдаеми

бяху вси глаголи сии. И положиша вси слышавшии в сердце своем, глаголюще: что убо отроча сие будет? И рука Господня бе с ним. И Захария отец его исполнился Духа Свята, и пророчествова, глаголя: благословен Господь Бог Израилев, яко посетити и сотворит избавление людем своим. И ты, отроча, пророк Вышняго наречешися, предидеши бо пред лицом Господним, уготовати пути Его. Отроча же растыше и крепляшеся духом, и бе в пустынях до дне явления своего ко Израилю.

По 50-м псалме стихира, глас 2:

Иже из чрева матерня освящся / и пророчества прием исполнение, / днесь от неплодных раждается, / Господне пришествие проповеда ясно: / покайтесь, приближися бо Царство Небесное.

Канона два: первый, творение Иоанна монаха, со ирмосом на 8, глас 4.

Песнь 1

Ирмос: Тростаты крепкия, / Рождейся от Девы, / безстрастия во глубине / души тричастное потопи, молюся, / да Тебе, яко в тимпанах, / во умерщвлении телесе / победное воспою пение.

Яко утро благолепно, Солнца предтекий, / неплодных прозябение проповедает яве Девы Рождество, / всей ныне вселенней сияет концем просвещение благочестия и благодати.

Пророк Вышняго истинно наречешися, / предидеши бо пред лицом Христа, – вопиет тебе, сыну, Иоанне прехвальне, / Духом Захария Пресвятым носим, – путь уготовати Зиждителю.

Глаголы Гавриила Захария слышав, вещания Божественнаго, явися непокорив, / и молчанием осуждается, решится же внезапно от сего: / глас бо родися Слова, Иоанн Предтеча.

Богородичен: Град Божий, Всецаря Богоприятное селение, сокровище честное, / Богородице Пренепорочная, сохрани достоиние Твое, / присно восхваляющее Тя и чтущее верою Рождество Твое.

Другий канон, творение Андреево, на 6, глас тойже.

Песнь 1

Ирмос: Наставльшему древле Израиля, / бежашаго от работы фараоновы, / и в пустыни питавшему, / поим Избавителю, Богу нашему, / яко прославися.

Молчание старчо законнаго писания образ носит таин. / Ибо, пришедши благодати, Моисей умолча: / подобаше бо, премудрости сокровищу явльшуся, всем молчати.

В церкви кадящу священнику, Ангел предста свыше, вопия: / странна рождества благовестие, приидох, тебе нося, старче: / примемши бо от неплодове рождения плод, Крестителя Христова.

Что удивился еси, старче? / Что, не веруя, стоиши, глаголющему тебе сия? / Ангел бо есть вещаяй, аще и образ носит человек. / Буди нем убо на время, даже до рождества Слова гласа.

Иже молчание Захариино, молчания положив образ закону написанному / и тем показав ми покаяния проповедника зовуща, / гласа вопиющего подавает, неплодствующей сына.

О, преславных вещей Христова Предтечи! / Иже, прежде пелен познав пленицы наша Разрешшаго и народы Освяща, / днесь, от Елисавети родився, разрешает отцу глас.

Богородичен: Тя, Божие вместилище и мысленную лестницу, еюже сниде Бог / и, вообразя, наше убо существо на Небеса возведе, / вси яко спасению Ходатаицу восхваляем.

Катавасия: Отверзу уста моя:

Песнь 3

Ирмос: Не мудростию, и силою, и богатством хвалимся, / но Тобою, Отчею Ипостасною Мудростию, Христе: / несть бо свят, паче Тебе, Человеколюбче.

Владычне убо от Девы совершается рождение, / но раба любезна от старницы и неплодные матери: / в лепоту предтичет убо чудо чудес.

Старница и плоды Деву Матерь лобзает, познавши неложно Сея Рождество, / яко разрешися союз неплодства Божественным хотением.

Богородичен: Неискусобратно Бога воплощенна рождши, / страстей прилоги обуреваемого мя утверди: / несть бо, Пречистая, разве Тебе помощницы.

Ин

Ирмос: Утверждаяй гром и созидаяй дух, / утверди мене, Господи, / да Тя пою истинно / и творю волю Твою, / яко несть свят, яко Ты, Боже наш.

Елисаветь, прежде плоды сущи, Христе, Церковь Твою проображаше, яже от язык, / и, рождши преславно, паки показывает многочадну / плоды являющуюся иногда.

Пути убо исправль Господни, стезю проуготовав, / покаяния же плоды показав еси человеком и жизненному научил еси пути, / пророче и проповедниче Христов.

Елисаветь, днесь играючи, носит тя, Предтече, / на объятиях состаревшихся и вопиет, хвалящаяся: / несть свят, якоже Ты, Господи Боже наш.

Богородичен: Праотцев разрешила еси печаль, радость нам рождающая, Животодавца и Избавителя, / Егоже, Пречистая Богородице, прилежно моли спастися стаду Твоему.

Седален, глас 8.

Подобен: Повеленное:

Захариин глас светло разрешив Словесе глас рождся, Предтеча, / и закона неплодие всем показав, зовый: / покайтесь, сущии на земли, се бо прииде и явится Иисус, / вся хотя избавити от первых клятвы, просвещая Крещением. / Воистинну чудо преславно!

Слава, глас 4.

Подобен: Удивіся:

Якоже со́лнце свѣтло, из чрева Елисавети возсия́ нам Заха́риин сын, / и о́тчее разреши́ безгла́сие, / и всем лю́дем в дерзнове́нии мно́зе, испра́вите, – вопия́, – путь Господень, / и́бо Той свободи́т и спасе́т к Немú притека́ющия. / Егóже пропове́дал еси́, Иоáнне, моли́ спасті́ся душáм нáшим.

И ныне, Богородичен:

Обнови́ла еси́, Чистая, Божественным Рождество́м Твои́м / истлѣвшее во страстѣх земнорóдных мѣртвенное существо́ / и воздвигла еси́ вся от смѣрти к животу́ нетлѣния. / Тѣмже Тя по до́лгу блажимъ вси, Дѣво Препросла́вленная, якоже прорекла́ еси́.

Песнь 4

Ирмос: Седя́й в сла́ве на Престо́ле Божества́ / во о́блаце лѣгце, / прииде́ Иисúс Пребоже́ственный / Нетлѣнною Длáнию и спасе́ зовúщия: / сла́ва, Христѣ́, си́ле Твоѣ́й.

Та́ин неизрече́нных предхо́дит та́инство / новосече́нием законоположе́ния естѣственнаго, / болѣзни разреше́ние провозвеща́ющи, исправле́ние сея́, Христѣ́, и обожѣние.

Иса́ия от Отца́ Сы́ну проро́чествова, воплотити́ся хотя́щему: / А́нгела земнорóдна равноа́нгельна се Аз посыла́ю пред лицѣм Твои́м, зовúща: / сла́ва, Христѣ́, си́ле Твоѣ́й.

Служити́, яко раб Влады́ще, роди́хся: / на се бо приидо́х, Сего́ возвестити́ пришѣствие, / яко да Дѣвы Рождество́ предувѣрит, пресла́вно непло́дствующая стáрица прозя́бши.

Богородичен: Святáя Богорóдица, в Ню́же вселити́ся благоизво́ли, / яко во благово́нен дом, Сло́во О́тчее Пребоже́ственное, / не растлѣ́ся утробо́ю, ни поболѣ́, / и́бо роди́ Емману́ила, Бóга и Челове́ка.

Ин

Ирмос: Услы́шах сла́вное смотре́ние Твоѣ́, Христѣ́ Бóже, / яко роди́лся еси́ от Дѣвы, / да от лѣсти изба́виши зовúщия: / сла́ва си́ле Твоѣ́й, Гóсподи.

Покая́ние отвѣрзе́ся твои́м рождество́м, Предте́че и проповѣдниче. / Ты бо еди́н пропове́дал еси́, взывáя: / пока́йтеся, Цáрство Небѣ́сное прибли́жися.

Дѣвство утвержда́ется и целомудрие торжествует, / пусты́ня веселити́ся и мир прáзднует рождество́м твои́м, Предте́че.

Елисаветь раду́ется, и Заха́рия вещáет па́ки: / о́ба úбо обновля́ются по стáрости Иоáнновым а́бие гла́сом и просвещáются.

Богородичен: Неопали́мую купину́ Тя законополо́жник зря́ще дрѣвле, / Дани́ил же го́ру святу́ю смотре́ше, еди́на Ма́ти Дѣво, Влады́чице.

Песнь 5

Ирмос: Нѣне востану, пророчески рече Бог, / нѣне прославлюся, нѣне вознесуся, / падшаго приѣм от Дѣвы / и к свѣту умному возносяй Моего Божества.

Земля израсти всеистинна проповѣдника, / гласа, всем проповѣдающа язѣком Духа, Дѣвы Сына, / Правду, с Небесе на нас приничущую вещь телесною.

Положи Господь всеистинна светильника тя Христова, вся просвещающаго, / едины одевающа враждующия Ему, яко ризою, в студ, / неложно Божия Слова Сына проповѣдающа.

Веселится вся тварь твоим рождеством, Божественне: / ты бо зѣмлен Ангел, Предтече, и Небесный человек показался еси, / Небеснаго Бога провозвещающа нам воплощенна.

Богородичен: От Тебе раждается от Отца Сый, / с Тобою присно, Слово присносущное и нераздельное, яко Сын Единородный, / и напоследок от Дѣвы Тойже от Святаго воплощается Духа.

Ин

Ирмос: Возсияй ми, Господи, свет повелений Твоих, / яко к Тебе дух мой утренюет и поет Тя: / Ты бо еси Бог наш, / и к Тебе прибегаю, Царю мира.

Звезду проуготовал еси, Правды Солнце, / Крестителя Твоего Иоанна, / от обещания рожденнаго днесь и рождшаго разрешша глас.

Не вещай, не сопротив глаголи, старче освящение, / Гавриил бо глаголет ти, первый во Архангелех, / Божия тайнства и еже к нам Того снिति сказую.

Старче, не неверуй, Бог бо обещаает, / яко в старости родиши сына, егоже о рождестве мнози возрадуются, / той бо придет силою Илииною.

Пророче, проповѣднике, Предтече, еже от неплоды прозябение, / возвестителю покаяния, пустынное овча, Света светильниче, / о всех моли, чтущих тя верно.

Богородичен: Яко дверь непроходиму, и купину неопалиму, / и несекому гору, от неяже камень усечется, / Иже из Тебе воплощаемый, воспеваем, Владычице, Мати всех Творца.

Песнь 6

Ирмос: Приидох во глубины морския, / и потопила мя есть буря многих грехов, / но, яко Бог, из глубины возведи живот мой, Многомилостиве.

Бога Слова познал еси, яко пророк, в матерней утробе, / и, сея языка употребив, богословиши в темне чертозе, / обожаемъ Светом Неприступным.

Немолчно, яко глас вопиющаго, Избавителя мира, Крестителю, моля не престай / душевное разрешити неплодие поющих твоё рождество.

Богородичен: Неприступнаго Божества селение, Чистая, Твоя утроба явися, о Богородице, / на нюже без боязни Небеснии чинове взирати не могут.

Ин

Ирмос: Бúря мя помышлénий, постígши, / во глубинú низвлáчит мя безмёрных грехóв, / но Ты, Упрáвителью Благíй, / предварív, упрáви, / я́ко проро́ка, и спасí мя.

Днесь пустýнный граждáнин Иоáнн раждáется, / покая́ния проповéдник и благодáти свидéтель íстинен, / Предтéча Сло́ва и Свéту предсия́ющая звездá.

Днесь секи́ра, искова́вшись, посече́ние предлага́ет душáм непло́дия, / и насажда́ет плоды́ добродéтельныя, / предýдет твёрдо в рождестве́ твоём, Предтéче.

Возра́довася Иорда́н преслáвно и игра́ет, научáясь, / Иоáнна слýша, от непло́дна рождéна чрэва, / мо́ре же ликúет водны́ми игра́нии.

Свети́льник, Свéта пришéствие предтéк, / проповéда А́гнца Бóжия, Спáса, / свет возсия́вшего землí, естества́ же всего́ духо́вне преджрэна.

Богородичен: Бэ́здну мíлости рóждшая, / страстéй мо́их бэ́здну пучíною щедрóт Тво́их потопívши, / тучу́ от душí пода́ждь ми слез, Богороди́тельнице Всенепорóчная.

Кондак, глас 3.

Подобен: Дéва днесь:

Прэ́жде непло́ды днесь Христо́ва Предтéчу раждáет, / и той естъ исполнénие вся́каго проро́чества: / Егóже бо проро́цы проповéдаша, / на Сегó во Иорда́не рúку положív, / явíся Бóжия Сло́ва проро́к, проповéдник, вкúпе и Предтéча.

Икос:

Восхва́лим ны́не Господ́ня Предтéчу, / егóже священнику́ Елисаветь родí из ложéсн непло́дных, но не без сэмене: / Христо́с бо едín вместíлище прóйде непроходíмо без сэмене. / Иоáнна непло́ды родí, без мýжа же сегó не родí, / Иисýса же, осенénием Отца́ и Дýха Бóжия, Дéва родí Чíстая. / Но Безсэменному́ явíся от непло́дных проро́к и проповéдник, вкúпе и Предтéча.

Песнь 7

Ирмос: Ю́ноши три в Вавилóне, / велénие мучíтелево на буйство́ прелóжше, / посреде́ пла́мене вопия́ху: / благословén есí, Гóсподи, / Бóже отéц нáших.

Бя́ше пёрвее во мрáце вся́ко земнорóдных естество́, о Предтéче, / но úтро, вопия́, явíлся есí: / благословén есí, Гóсподи, Бóже отéц нáших.

Недúговавшее исцели́ естество́ все, слáвное от непло́дных твоё рождество́, / научívшее, Предтéче, пéти: / благословén есí, Гóсподи, Бóже отéц нáших.

Родíлся есí, Предтéче, от непло́дных, / прииде́ бо всейстинно, закóну непло́дствующу, благодáть, Христу́ пою́щи: / благословén есí, Гóсподи, Бóже отéц нáших.

Богородичен: Дéво Благословénная, моли́ о нас, моля́щих Тя, / на Тя бо упова́ем вси и Тебé вопи́ем: / Влады́чице, не прэ́зри рабóв Тво́их.

Ин

Ирмос: В пещи авраамстии отроцы персидстей, / любвию благочестия паче, / нежели пламенем, опаляеми, зываху: / благословен еси в храме славы Твоея, Господи.

Захария, умолчав на время, возвести молчание писанием / и, паки провещав, рождеством твоим, Предтече, / Духа благодать возвещает преславно.

Церкви подобится неплоды безчадная, Елисаветь всечестная, / яже первее убо сущи требами и скварами очернена, / ныне же хвалящаяся и добротой и рождением.

Предтечи рождеством острится днесь секира духовная, / еюже вся посекаются страстей выгнания, / тайно же процветают плоды покаяния.

Яко ветхаго и новаго ходатая ты, Предтече, / и стези исправляющая Христовы, / очищающего согрешений гумно духовною лопатою, почитаем, Иоанне.

Иже пред Солнцем текшаго, Христом Богом нашим, Иоанна славнаго, / яко звезду, Предтечу и покаяния проповедника воспоём вси, от неплодных прошедшаго.

Богородичен: Во чрево Твое, Дево, безсеменно всельшася, / и рождшася за неизреченное и конечное смирение, и нас ради Обнищавшаго / о всех молити не престай, Богородице.

Песнь 8

Ирмос: Избавителю всех Всесильне, / посреде пламене благочествовавшия, / снизшед, оросил еси / и научил еси пети: / вся дела, благословите, пойте Господа.

Законоположник раб быше Моисей, Иисус же – Бог Завета Новаго, / ныне же обоих Предтеча поет, яко ходатай: / вся дела, благословите Господня Господа.

От пуста чрева горлица прииде, яко богосажденная дубрава, / ныне принесет Церкви Предтечу Христова и воспевает: / вся дела, благословите Господня Господа.

Богоноснии людие, язык свят, горлице Христовей уподобитесь / и медоточно воспойте, в целомудрии живуще: / вся дела, благословите Господня Господа.

Троицен: Тричисленным светом озаряеми, Несозданное Единое Божество, / немолчными усты православно вопиюще, почтим: / вся дела, благословите Господня Господа.

Ин

Ирмос: Всяческая, Владыко, премудростию Твоею составил еси, / земли же паки утвердил еси, якоже веси, дно, / основанием водрузивый на водах безмерных. / Тем вси вопиём, воспевающе: / благословите, дела Господня, непрестанно Господа.

Познал еси, Предтече, Емуже поклонился еси прежде рождества / и прежде пелен твоих, Христа Жизнодавца, / и разыгранными показал еси Сего, Господа Твоего нарек, / взаимь взем матерний язык к пению Христа, Бога нашего.

Концы днесь вселенстии предпразднуют, / радуются Ангели и души праведных, / живущии веселятся, умершии же паки, Иоанну рождшуся, / приемше им проповедь всех Спаса Господа.

Подобяся днесь Иоанну, Иордан мокрыми быстринами играше преславно, / слыша раждаема равноангельнаго житием от старницы неплодны, / исправляющаго пути и стези Господни и мир крестившаго.

Начерта днесь Захария на дще / имя богонареченное пророка и Предтечи, молча же возва: / Иоанн да наречется рождейся мне на старость. / Подобно есть от обещания рождшемуся странное звание.

Богородичен: Крепко утешение и непостыдну надежду, / стену небориму и Божественно предстательство людие Твои имут Тя, / иже Тя славят, Дево, и, спасаеми, зовут прилежно: / благословите, вся дела Господня, непрестанно Господа.

Песнь 9

Ирмос: Сокровенное Божие неизреченное / в Тебе совершается явственное таинство, / Дево Пречистая, / ибо Бог из Тебе воплотился за милосердие. / Темже Тя яко Богородицу величаем.

Се глас Предтечи неплодным и пустым предста сердцам вопиющ: / путь Христов ныне уготовите, яко во славе грядет, / Емуже повинующеся, величаем.

Якоже древле Духом Пресвятым яве проповедал еси / Сына, Предтече, Агнца Божия, мира вземлющаго грехи, / стаду твоему согрешений разрешение испроси.

Троицен: Единицу Тричисленную, Троицу Единосущную, / православно поюще, вернии, прославим, / богодетельне нас озаряющую / и светлостью незаходимаго света исполняющую души наша.

Богородичен: Всеми владычествующая творении, людем Твоим даруй победу одоления, / непокориваго подложи под нозе воинству: / да Тя яко Богородицу величаем.

Ин

Ирмос: Яко сотвори Мне величия Сильный, / и свято Имя Его, / и милость Его / в род и род боящимся Его.

В тебе великое се и преславное Бог сотвори знамение, священниче: / по старости бо сына и по умерщвлении удов раждаеши Предтечу.

Да слышат неплоды и да воспоют Бога, / се бо Елисавет вопиет: / по старости сына и по умерщвлении удов раждаю Предтечу.

Веселися, Захарие, и радуйся ныне о Бозе: / се бо Елисавет сосцы питает по старости сына / и по умерщвлении удов раждает Предтечу.

Слава Давшему неплодней по старости плод, старцу и пророку сына, / готовяща Ему люди совершенны, / Божественного Предтечу.

Богородичен: В Тя вселівся, Иже в недрах сый Отческих родися без страсти и тли / и приведе нас за милосердие Отцу и Божественному Духу.

Светилен.

Подобен: Жены, услышите:

Предтечево днесь радостотворное рождение / сетование решит отча безгласия и рождшия неплодство, / возвещает же настоящую радость и веселие. / Темже и вся тварь светло тое празднует.

Богородичен. Подобен:

Пророцы проповедаша, апостоли научиша / и мученицы богомудренно Твоего Сына, Богородице, ясно исповедаша, Бога всех, Пречистая. / С ними же Тя величаем, Тобою избавльшися древняго осуждения.

На хвалитех стихиры на 4, глас 8.

Подобен: О, преславнаго чудесе:

О, преславнаго чудесе! / Из престарелыя матери / Божия Слова провозвестник, / Иоанн днесь произыти тщится, / связанный язык яснейше рождеством глаголати являет. / О, неизглаголаннаго Твоего смотрения, Владыко! / Имже, Христе, / спаси души наша, / яко един Милосерд.

О, преславнаго чудесе! / В рожденных женами / пророк же превышший / матерняго неплодства разрешает осуждение, / иже духом и силою пришед Илииною / путь Господень исправить. / О, неизглаголаннаго Твоего благоутробия, Владыко! / Имже, Христе, спаси души наша, / яко един Милосерд.

О, преславнаго чудесе! / Проповедавый Христова к человеку истощание / превыше показывает всех Того гласом / и рождшия разрешает неплодие / силою Божественною / и Захариин язык. / О, великих Твоих чудес, Владыко! / Имиже, Христе, / спаси чтущия Твоего великаго Предтечу.

О, преславнаго чудесе! / В рожденных женами / пророк и Предтеча превыше является, / пророков же превышший / и пришествия Христова предвозвестник, / предвыгравый во утробе матери. / О, zelo великих Твоих дарований, Человеколюбче! / Имиже, Христе, спаси души наша, / яко Всесилен.

Слава, глас 6. Анатолиево:

Звезда звезд, Предтеча / от неплодных утробы на земли раждается днесь, / Иоанн Боговоделенный, / и Христову являет зарю, восток свыше, / в правое верных переходение.

И ныне: Богородице, Ты еси лоза: **Славословие великое. И отпуст.**

НА ЛИТУРГИИ

Блаженны Предтечи перваго канона, песнь 3-я, на 4, и втораго, песнь 6-я, на 4. По входе тропарь храма Христова и Богородицы, аще есть, таже тропарь Предтечи. Посем кондак храма Христова. Слава, Предтечи. И ныне, храма Богородицы. Аще несть храма Богородицы, И ныне, кондак храма Христова. Аще несть храма Христова, глаголем тропарь прежде Предтечи. Слава, кондак его. И ныне, Предстательство христиа́н: **Прокимен, Апостол и Евангелие** чтем Предтечи един, такожде и причастен.

Прокимен, глас 7: Возвеселится праведник о Господе / и уповает на Него. **Стих:** Услыши, Боже, глас мой, внемди моли́ти ми ся к Тебе́.

Апостол к Римляном, зачало 112:

Братие, ныне ближайшее нам спасение, нежели егда́ вероухом. Ношь убо прейде, а день приближися: отложим убо дела́ темная, и облечемся во ору́жие све́та. Яко во дни, благообразно да ходим, не козлогласования и пьянствы, не любодейнии и студодейнии, не рвением и завистию, но облечы́теся Господем нашим Иисус Хри́стом, и плоти́ уго́дия не творите в по́хоти. Изнемогающего же в вере прие́млите, не в сомнение помышлений. Ов бо верует ясти вся, а изнемога́яй зелия да яст. Ядый не ядущаго да не укоряет, и не ядый ядущаго да не осуждает, Бог бо его́ прият. Ты кто еси́ судья чуждému рабу́? Своему́ Господви стои́т, или́ па́дает, ста́нет же, си́лен бо есть Бог поста́вити его́.

Аллилуиа, глас 1: Благословен Господь, Бог Израилев, яко посетити и сотвори́ избавление лю́дем Своим. **Стих:** И ты, отроча́, проро́к Вышняго нарече́шися.

Евангелие от Луки, зачало 1:

Поне́же убо мно́зи нача́ша чини́ти повесть о извествованных в нас вѣщех, якоже преда́ша нам, иже испѣрва самовидцы и слуги́ бывшии словеси́, изво́лися и мне послѣдовавшу вѣше всех испы́тно, по ряду́ писати тебе́, державный Фео́филе, да разуме́ши, о нихже научи́лся еси́ словесѣх утвержде́ние. Бысть во дни Ирода, царя́ Иудейска, иерей некий, и́менем Захария, от дневны́я чреды́ Ави́ани, и жена́ его́ от дщѣрей Ааро́новех, и и́мя ей Елисаветь. Бѣста же праведна́ оба́ пред Богом, ходя́ща во всех за́поведех и оправданиих Господних безпорочна. И не бе́ има́ ча́да, поне́же Елисаветь бе́ непло́ды, и оба́ заматорѣвша во днѣх сво́их бѣста. Бысть же служа́щу ему́ в чину́ чреды́ свое́я пред Богом, по обы́чаю священничества, ключи́ся ему́ покади́ти вшед в це́рковь Господню, и все мно́жество люде́й бе́ моли́тву де́я вне, в год фими́ама. Яви́ся же ему́ Ангел Господень, стоя́ одесну́ю олтаря́ кади́льнаго, и смути́ся Захария́ видев, и страх нападе́ нань. Рече́ же к нему́ Ангел: не бойся́, Захарие, зане́ услышана бысть моли́тва тво́я, и жена́ тво́я Елисаветь роди́т сына́ тебе́, и нарече́ши и́мя ему́ Ио́анн, и бу́дет тебе́ ра́дость и весѣлие, и мно́зи о рождествѣ́ его́ возра́дуются. Бу́дет бо ве́лий пред Господем, и вина́ и сикѣра не́ имать пи́ти, и Ду́ха Свята́го испо́лнится ещѣ́ из чре́ва ма́тере свое́я. И мно́ги от сыно́в израи́левых обрати́т ко Господу́ Бо́гу их. И той преды́дет пред Ним ду́хом и си́лою Илиино́ю, обрати́ти сердца́ отце́м на ча́да, и противны́я в му́дрости праведных, угото́вати

Господеву люди совершены. И рече Захария ко Ангелу: по чесому разумю сие? Аз бо есмь стар, и жена моя заматоревши во днех своих. И отвещав Ангел, рече ему: аз есмь Гавриил предстоюй пред Богом, и послан есмь глаголати к тебе и благовестити тебе сия. И се будеши молча, и не могый проглаголати, до негоже дне будут сия, зане не веровал еси словесем моим, яже сбдутся во время свое. И беша людие ждуще Захарию, и чудяхуся коснящу ему в церкви. Изшед же не можаше глаголати к ним, и разумеша, яко видение виде в церкви, и той бе помавая им, и пребываше нем. И бысть яко исполнися дние службы его, иде в дом свой. По сих же днех зачат Елисавет, жена Захариина, и тайшеся месяц пять, глаголющи: яко тако мне сотвори Господь во дни, в няже призре отяти поношение мое в человецех. Елисавети же исполнися время родити ей, и роди сына. И слышаша окрест живущии и ужики ея, яко возвеличил есть Господь милость свою с нею: и радовахуся с нею. И бысть во осмый день, приидоша обрзати отроча, и нарицаху е именем отца его, Захарию. И отвещавши матери его, рече: ни, но да наречется Иоанн. И реша к ней: яко никтоже есть в родстве твоём, иже нарицается именем тем. И помаваху отцу его, еже како бы хотел нарещи е. И испрошь дщицу, написа, глаголя: Иоанн будет имя ему. И чудяхуся вси. Отверзошася же уста его абие и язык его, и глаголаше благословя Бога. И бысть на всех страх живущих окрест их, и во всей стране иудейстей повѣдаеми бяху вси глаголи сии. И положиша вси слышавшии в сердце своём, глаголюще: что убо отроча сие будет? И рука Господня бе с ним. И Захария отец его исполнися Духа Свята, и пророчествова, глаголя: благословен Господь Бог Израилев, яко посетити и сотвори избавление людем своим. И ты, отроча, пророк Вышняго наречешися, предыдеши бо пред лицом Господним, уготовати пути Его. Отроча же растяше и крепляшеся духом, и бе в пустынях до дне явления своего ко Израилю.

Причастен: В память вечную будет праведник, от слуха зла не убойтся.

Ряд же, Апостол и Евангелие вычитаем наперед. Подобаает ведати, яко аще случится праздник Иоанна Предтечи в неделю, предваряются вся воскресная.

Молитва

Крестителю Христов, проповедниче покаяния, кающагося не презри мене, но, совокупляясь с вои Небесными, молися ко Владыце за мене, недостойнаго, унылаго, немощнаго и печальнаго, во многия беды впавшаго, утружденнаго бурными помысли ума моего. Аз бо есмь вертеп злых дел, отнюд не имеяй конца греховному обычаю: пригвожден бо есть ум мой земным вещем. Что сотворю, не вем, и к кому прибегну, да спасена будет душа моя, токмо к тебе, святый Иоанне, благодати тезоимените, яко ты пред Господем, по Богородице, вем больша быти рожденных всех: ты бо сподобился еси коснуться верху Царя Христа, вземлющаго грехи мира, Агнца Божия. Егоже моли за грешную мою душу, да поне отныне, в первый надесять час, понесу тяготу благу и приму мзду с последними. Ей, Крестителю Христов, честный Предтече, крайний пророче, первый во благодати мучениче, постников и пустынников наставниче, чистоты учителю и ближний друже Христов, тя молю, к тебе прибегаю, не

отрѣни мене́ от твоегѡ заступлѣнія, но возста́ви мя, па́дшагося мно́гими грехи́: обновѣ́ ду́шу мою́ покая́нием, я́ко вторы́м крещѣ́нием, поне́же обоегѡ нача́льник еси́: крещѣ́нием омыва́яй грех, покая́ние же проповѣ́дуяй во очищѣ́ние когѡ́ждо дел сквѣ́рных: очисти́ у́бо мя, грехми́ оскверне́ннаго и понуди́ внѣсти, а́може ничто́же сквѣ́рно входит в Ца́рствие Небе́сное. Ами́нь.